

Vyf-en-twintigste week in Koninkrykstyd

11 November

Hebreërs 9:24-28

Die volkome offer

Ysbreker

Hoe voel jy wanneer jy jou opoffer vir mense en niks terug ontvang nie?

Lof en aanbidding

Geniet nou net die nabyheid van die Here en loof en aanbid Hom met julle liedere. Kom dan tot rus en dink aan Hom wat in liefde by jou is en na jou kyk. Rus net by Hom. Dink aan een ding wat Hy jou gegee het waarvoor jy nou wil dankie sê. Dink ook daaraan dat Hy Homself aan jou gegee het. Sê dankie. Iemand sluit die stilte af met die lees van Psalm 127:1,2.

Woord

Heb.9:24-28

1. Lees eers die paar verse in stilte. Herhaal die woorde wat jou raak in jou hart. Dink na oor wat die woorde in jou binnewêreld doen. Praat met die Here jou God daaroor.
2. Waarom het Christus in die heiligdom ingegaan? Wat beteken dit vir ons? (Vers 24)
3. Hoe raak die feit dat Hy Homself geoffer het vir ons? (Verse 25-26)
4. Waarvoor verskyn Jesus tweemaal? (Verse 27-28) Wat beteken dit as ons vir mekaar sê: "Nou is jy vry om te gaan wees wie jy in Christus is"?
5. Raak nou weer stil en lees weer die gedeelte. Sien jouself saam met jou Here voor die Vader. Die Vader kyk na jou met liefde, sonder enige oordeel, Hy sien geen sonde nie, dit is weggeneem. Wat wil jy vir Jesus sê? Wat is in jou hart om met jou Vader te deel.

Bedien mekaar

Draai 3-3 na mekaar toe. Sit net eers bietjie saam stil en sien julleself in die heiligdom. Deel dan julle behoeftes met mekaar en bid vir mekaar.

Uitsending

Hoe gaan die groep die offer wat die Here gebring het gestalte gee in die omgewing?